

49. KRISHNÆ nubes, postquam hoc vocis nectare deorum fruges, RÁVANÆ ariditate siccatas, rigasset, evanuit.

50. INDRAS et reliqui dei VISHNUEM, qui negotium eorum perfecturus erat, per partes sequebantur, velut arbores ventum prosequuntur per flores.

51. Tum vero sub finem sacrificii, quod hominum moderator ad optatum suum impetrandum instituerat, species processit ex igne, sacerdotibus terrorem injiciens.

52. Manibus suis in vase aureo potum tenebat lacteum, quem ipse etiam vix portare poterat, quia deus princeps in illum ingressus erat.

53. Accepit rex potum illum, a deo supremo sibi oblatum, sicut INDRAS aquarum medullam, ab oceano productam.

54. Quantæ fuerint regis virtutes, in aliis viris haud reperiendæ, id eo indicatur, quod ipse trimundii auctor ex eo nasci cupiebat.

55. Distribuit ille VISHNUIS semen, sub potus specie latens, inter duas uxorum suarum, veluti sol recentem suum ardorem inter cælum et terram.

56. Dilecta ei erat KAUSALYA, amata quoque uxor e KEKAYÆ familia orta : ideo rex SUMITRAM ab utraque honoratam videre optabat.

57. Utraque uxor, cognoscentes optatum mariti sui, regis prudentis, illi dimidiarum suarum potus partium dimidium dederunt.

58. Illa etiam utriusque conjugis sociæ amans erat, sicut apis duarum liquoris linearum, ex elephanti temporibus manantium.

59. Ab illis ad civium salutem gestabantur foetus, e dei particulis orti, sicut foetus aquosus gestatur a solis fistulis, quos radios appellant.

60. Simul gravidæ factæ fulgebant splendore subpallido, sicut frugum culmi, in quibus fructus origines latent.

61. Unaquæque in somno sese custoditam videbat a nanis, concham, ense, clavam, arcum, discumque ferentibus.

62. Vehebanturque a GARUDA, aureis suis alis splendoris opiam per aera diffundente, et celeritate sua nubes secum trahente.